

Der Steigerwaldexpress

=====

As Zügla kummt va Freesdärf rauf,
pustät, schnauft im Eilschritt Lauff.
Dä Rach is dick, die Luft is ganz vepäst,
es is net grad as gsünsta füä die Gäst.
Ka Fenstä kä mä aufmachn, es is a Buß,
sünst wäd dä Hals, as Gesicht voll Ruß.
Dämpf und Rach hãm an ganzn Zuch umgãm,
vä dä schön Landschaft kä mä fãst nex säng.
Aufamol bimmlst, die Pfeufn ätönt ganz schrill,
an Ruckä - mä märkts, däßä hält n will.
Die Bremsn kreischn, dä Zuch helt ä,
Burgäbrich is, am Bahnhof schtehts drã.
A Opa geht raus, söcht löst euch grüßn,
a poä gehn rei tãm ihä Fohäkatn lösn.
Dä Bahnhofsvöaschtehä, eä schtellt die Weing,
dä Schäffnä gibt a Lockführä Zeing.
Dä Heizä muß etz fest nei schüän,
märkstäs - a Ruckä, dä Zuch tut sich rühän...
..Die Benk sen hat, as Kreuz tut weh,
in dä drittn Kläss föhät mä hält net so schö.
Alläs einfãch, - sie hot weitä kan Komfoä,
nuä füäs notwendigsta find mä a klans Eckla voä..
Mit föhät a Mä, hot an Säck lebendich und rund,
drinna grulzn zwa Ferkäli - kãngesund.
Nãm drã sitzt a Dame, ganz schärmand,
sie kommt aus Bamberg und will aufs Land.
Ihä des alläs ganz empfindlich schtööt,
sie söcht, "so was doch in den Viehwagen gehört.
Dä Mä äwiedät, eä föhät sie ä,
"du, wenn däs net päßt, gehst wu änäscht nä.
Ghöät hots dä Schäffnä, schmunzlt, märkt goä net drauf,
doch plötzlich, dann setz dä sei Amtsmiena auf.
"Ja, Sappra, Dunnäwättä nei,
wos is dänn des do hint vä Gschrei!
Wenn dä etz net gleich parieät,
wäd dä bei dä näxtn Schtation nausboxieät."
Ruh is. - sie wäd im Gesicht a bissla rot,
eä beißt bekümmät nei an Schtückla Brot...
..Die Lock, die pustät, Rach trãbbts zu die Fenstä rei,
aufn zieng Äckä und Wiesn väbei.
Die Rädä rattän - lång, lang is heä,
dä Schteichäwaldexpres. eä föhät net mehã...